



**XUNTA
DE GALICIA**



**Concello de
OURENSE**

**CONVENIO DE COLABORACIÓN ENTRE A AXENCIA GALEGA DE
INFRAESTRUTURAS, O SERVIZO GALEGO DE SAÚDE, A DEPUTACIÓN
PROVINCIAL DE OURENSE E O CONCELLO DE OURENSE PARA O
FINANCIAMENTO E EXECUCIÓN DA URBANIZACIÓN DOS ACCESOS AO
COMPLEXO HOSPITALARIO UNIVERSITARIO DE OURENSE**

Santiago de Compostela, 15 de marzo de 2016.

REUNIDOS

Dunha parte, Jesús Vázquez Almuiña, conselleiro de Sanidade e presidente do organismo autónomo Servizo Galego de Saúde, facultado para a formalización deste convenio polo Decreto 43/2013, do 21 de febreiro, polo que se establece a estrutura orgánica do Servizo Galego de Saúde,

Doutra parte, Ethel María Vázquez Mourelle, conselleira de Infraestruturas e Vivenda e Presidenta da Axencia Galega de Infraestruturas, facultada para a formalización deste convenio polo Decreto 173/2011, do 4 de agosto, polo que se aproba o estatuto da Axencia Galega de Infraestruturas,

Doutra parte, José Manuel Baltar Blanco, Presidente da Deputación Provincial de Ourense, facultado para a formalización deste convenio en virtude do disposto no artigo 34.1.b) da Lei 7/1985, do 2 de abril, reguladoras das Bases do Réxime Local e 105.1.a) da Lei 5/1997, do 22 de xullo, de Administración Local de Galicia, conforme ao acordado pola Xunta de Goberno da Deputación de Ourense o 11 de marzo de 2016, e sen prexuízo da necesaria ratificación deste acordo polo Pleno da Deputación.

E doutra, Jesús Vázquez Abad, alcalde do Concello de Ourense, facultado para a formalización deste convenio en virtude do disposto no artigo 124.4.a) da Lei 7/1985,



XUNTA
DE GALICIA



Concello de
OURENSE

do 21 de abril, reguladora das bases do Réxime Local e 61.1.a da Lei 5/1997, do 22 de xullo, de Administración Local de Galicia.

Todas as partes recoñécense mutuamente na calidade en que interveñen con capacidade legal suficiente e necesaria para o outorgamento do presente convenio de colaboración e a tal efecto

EXPOÑEN

PRIMEIRO.- Que o Servizo Galego de Saúde configúrase coma un organismo autónomo, que ten como finalidade a xestión dos servizos sanitarios de carácter público dependentes da Comunidade Autónoma de Galicia e a coordinación integral de todos os recursos sanitarios e asistenciais.

Así, o seu obxectivo é a provisión dos servizos e das prestacións de atención sanitaria individual de cobertura pública no ámbito da Comunidade Autónoma, dentro do marco de financiamento do sistema público de saúde de Galicia, garantindo os dereitos recoñecidos aos cidadáns.

Exerce, pois, o goberno, a dirección e a xestión dos centros, servizos e establecementos sanitarios propios ou adscritos, garantindo a provisión dos servizos e prestacións de asistencia sanitaria de cobertura pública, coordina a xestión dos recursos humanos, materiais e financeiros que teña asignados, e exercerá as funcións que lle delegue ou encomende a Consellería de Sanidade.

Neste senso, o Servizo Galego de Saúde ten atribuídas competencias no tocante a planificación, execución e control dos programas de investimentos relativas a obras, instalacións e equipamentos dos centros asistenciais en coordinación coa Dirección Xeral de Asistencia Sanitaria, correspondéndolle a tramitación e xestión dos expedientes de contratación.



XUNTA
DE GALICIA



Concello de
OURENSE

SEGUNDO.- Que a Consellería de Infraestruturas e Vivenda configúrase, de acordo co disposto no Decreto 165/2015, de 13 de novembro, que aproba a súa estrutura orgánica, como o órgano da Administración da Comunidade Autónoma ao cal lle corresponden as competencias e funcións en materia de infraestruturas, mobilidade e vivenda, consonte o establecido no Estatuto de autonomía para Galicia nos termos sinalados na Constitución española e que exercerá no nivel de desenvolvemento que se indica no decreto de estrutura orgánica desta para cada un dos órganos integrantes deste departamento.

Asemade, para o desenvolvemento das súas funcións, esta consellería conta, entre outras, como entidade instrumental adscrita á Axencia Galega de Infraestruturas, creada en virtude da autorización prevista na disposición adicional cuarta da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, polo Decreto 173/2011, do 4 de agosto, polo que se aproba o seu estatuto.

TERCEIRO.- Que á deputación provincial, como órgano de goberno da provincia, correspóndelle como competencia propia, conforme ao artigo 36.1.d) da Lei de Bases do Réxime Local, o fomento do desenvolvemento económico e social da provincia.

CUARTO.- Que, segundo dispoñen os artigos 25 e 26.1 da Lei 7/1985, do 2 de abril, Reguladora das Bases do Réxime Local e os artigos 80 e 81 da Lei 5/1997, do 22 de xullo, de Administración Local de Galicia, os concellos deberán prestar á súa cidadanía os servizos públicos que contribúan a satisfacer as necesidades e aspiracións da comunidade de veciños.

QUINTO.- O organismo autónomo Servizo Galego de Saúde, no marco das súas atribucións, está a desenvolver as actuacións de ampliación do Complexo Hospitalario de Ourense nunha parte situada na parcela nº 12 do proxecto de compensación do AR-39, cedida con data 5 de outubro de 2011 polo Concello de Ourense.



XUNTA
DE GALICIA



Concello de
OURENSE

No acordo de cesión de terreos, adoptado na Xunta de Goberno Local do 29 de abril de 2010, o Concello de Ourense comprométese “a asumir todos os gastos necesarios para dotar á parcela 12 ubicada na área de reparto AR 39, cedida ao Servizo Galego de Saúde para o seu destino á ampliación do Complexo Hospitalario de Ourense (CHUO), das infraestruturas necesarias, tales como accesos rodados e peonís, abastecemento de auga, saneamento, subministración eléctrica, alumado, telefonía, en condición e características suficientes para a efectividade dun centro hospitalario”.

Pola súa banda, a execución das obras correspondentes a este novo edificio de hospitalización conta coa preceptiva licenza municipal concedida polo Concello de Ourense, por Acordo da Xunta de Goberno Local do 27 de marzo de 2013. No devandito acordo sinálase que “cara a garantir e co obxecto de asegurala correcta execución, así como o carácter previo ou simultáneo das obras de urbanización dos terreos sobrantes da edificación respecto as obras de edificación, en aras do interese público e toda vez que se trata de permitir a execución dun proxecto estratéxico para a cidade, dotación pública de interese supramunicipal, o Concello de Ourense comprométese a executar as obras de urbanización da fase I do Proxecto de urbanización da AR-39 E”.

No dito acordo de concesión de licenza engádese que “non se permitirá a ocupación dos edificios ata que non estea realizada totalmente a urbanización que afecte a ditos edificios e estean en condicións de funcionamento as subministracións de auga e enerxía eléctrica e as redes de sumidoiros”.

O proxecto de urbanización da AR 39-E, definitivamente aprobado pola Xunta de Goberno Local de 14 de agosto do 2009 ,foi declarado nulo de pleno dereito por basearse no PXOM de 2003 pola sentenza do 26 de xuño do 2012 (confirmada polo TSJ na súa sentenza de 7 de marzo de 2013). Posteriormente tramitouse novo proxecto de urbanización que foi denegada na Xunta de Goberno Local de 25 de



XUNTA
DE GALICIA



Concello de
OURENSE

febreiro ao emitir informe desfavorable (preceptivo e vinculante) o organismo de conca, motivos polo que non se puido realizar a urbanización.

A obra de referencia foi adxudicada cun prazo de execución de 26 meses. A acta de planteamiento e autorización de inicio de obra tivo lugar o 6 de xuño de 2014. Así, a finalización desta obra está prevista para o 6 de setembro de 2016. Non obstante, os traballos aos que se comprometeu o Concello de Ourense non foron iniciados e, polo tanto, existía o risco de non ser operativa a obra en execución da Fase I do Complexo Hospitalario Universitario de Ourense.

Neste senso, debe terse en conta que a maior parte dos terreos afectados polas obras de urbanización dos accesos ao Complexo Hospitalario Ourense forman parte integrante da Área de Reparto 39-E ámbito nº 12 previsto no Decreto 187/2011, de 29 de setembro, polo que se suspendeu parcialmente a vixencia do Plan Xeral de Ordenación Urbana de Ourense e se aprobou a ordenación urbanística provisional ata a entrada en vigor do novo planeamento. Trátase de terreos integrados nun único polígono, para o que o planeamento prevé, como sistema de execución, o de compensación, atopándose xa constituída a correspondente Xunta de Compensación e aprobado definitivamente e con carácter firme o proxecto de compensación. Máis en concreto, as parcelas de resultado con aproveitamento urbanístico inmediatamente lindeiras cos viarios previstos son parcelas de titularidade da Deputación Provincial (parcela 1B) e da sociedade mercantil en liquidación Urbaourense S.A., cuxo socio único é a Deputación Provincial (parcela 1A).

Outra parte dos terreos afectados polas obras de referencia atópanse fóra da área de reparto, xa en solo urbano consolidado.

Tendo en conta o anterior, é preciso advertir que a vixente lexislación urbanística establece de modo claro que o deber de urbanización dos terreos incluídos nun polígono para o que esta prevista a execución a través do sistema de compensación



corresponde aos propietarios dese polígono, a través da Xunta de Compensación, debendo ademais efectuarse a execución por polígonos completos, tal e como establece o artigo 123.1 da Lei 9/2002, de 31 de decembro, de Ordenación Urbanística de Galicia. Non obstante o anterior, o artigo 124 desta lei, en coherencia co previsto no artigo 123.2, inciso derradeiro, permite aos municipios executar actuacións illadas en solo urbano (sen distinguir, para estes efectos, entre solo urbano consolidado ou non consolidado, co dato engadido de que o devandito artigo 123.2 exclúe expresamente da obriga de executar o polígono completo no suposto de actuacións illadas a que se refire o artigo 124, exclusión que, polo tanto, implica que o suposto previsto no artigo 124 é aplicable tamén a solos non consolidados incluídos en polígonos). Neste mesmo senso, se pronuncian os artigos 100,2 e 103 da nova Lei 2/2016, de 10 de febreiro, do Solo de Galicia, que entrará en vigor o vindeiro 19 de marzo.

Ao abeiro destas normas, é legalmente posible, dende o punto de vista urbanístico, anticipar a execución de parte das obras de urbanización do ámbito nº 12 da ordenación provisional (Área de reparto 39 E). Por razóns técnicas, e para garantir a coherencia da actuación co remate das obras de ampliación do CHOU, estímase conveniente que a execución desa obra parcial de urbanización sexa asumida pola Xunta de Galicia, a través da Axencia Galega de Infraestruturas, empregando o procedemento do artigo 198 da LOUG para a autorización da actuación.

No que atinxe ao financiamento destas actuacións, e dado que as parcelas de resultado directamente afectadas pola actuación – e que, por tanto, se verían inmediatamente beneficiadas, ao completar de xeito anticipado o proceso de urbanización – son propiedade, directa ou indirectamente, da Deputación Provincial, estímase que o financiamento destas actuacións debe ser asumido pola administración provincial, que no seu día poderá deducir os gastos xa efectuados das súas achegas á Xunta de Compensación. En cambio, e polo que se refire ás actuacións illadas situadas fóra do polígono, ao tratarse de solo urbano consolidado o financiamento debe corresponder ao concello de Ourense, como administración



**XUNTA
DE GALICIA**



**Concello de
OURENSE**

urbanística competente, e de conformidade co compromiso xa adquirido polos acordos da Xunta de Goberno municipal de 29 de abril do 2010 e 27 de marzo de 2013, ao que xa se fixo mención.

En consecuencia, tendo en conta o excepcional interese público que implica á posta en funcionamento dos servizos sanitarios que serán prestados neste novo edificio de hospitalización, e a urxencia para que se leven a cabo os mesmos de acordo cos prazos de execución previstos, e considerando a confluencia dos intereses das partes comparecentes, faise preciso artellar as bases xurídicas, técnicas e económicas para a óptima coordinación e así regular a colaboración nas súas actuacións, nos termos anteriormente expostos, de xeito que as obras sexan financiadas pola Deputación (na parte que afecta á área de reparto) e o Concello (na parte que afecta ao solo consolidado) executándose pola Xunta de Galicia a través da Axencia Galega de Infraestruturas.

Para o fin mencionado, formalízase o presente convenio con suxeición ás seguintes

CLÁUSULAS

PRIMEIRA. OBXECTO

O obxecto do presente convenio é establecer as bases da colaboración técnica e económica entre a Axencia Galega de Infraestruturas, o organismo autónomo Servizo Galego de Saúde, a Deputación Provincial de Ourense e o Concello de Ourense para a execución das obras de urbanización dos accesos ao Complexo Hospitalario Universitario de Ourense.

O orzamento máximo total da obra é de un millón trescentos sesenta mil trescentos corenta e cinco con cincuenta e tres Euros (1.360.345,53 €), IVE incluído.



XUNTA
DE GALICIA



Concello de
OURENSE

As obras que se executarán defínense na memoria descritiva anexa, que forma parte do presente convenio a tódolos efectos. No orzamento da memoria detállanse os custes que corresponden ás obras que afectan á área de reparto (que serán financiadas pola Deputación) e as que afectan a solo urbano consolidado (que serán financiadas polo Concello de Ourense).

O importe total a aboar tanto por parte do Concello de Ourense como pola Deputación Provincial de Ourense virá determinando pola aplicación da porcentaxe de baixada na licitación sobre os importes máximos establecidos nas cláusulas cuarta e quinta.

SEGUNDA.- COMPROMISOS DO ORGANISMO AUTÓNOMO SERVIZO GALEGO DE SAÚDE

A Xunta de Galicia, a través do organismo autónomo Servizo Galego de Saúde comprométese a:

1. Financiar a redacción do proxecto de construción para a realización dos accesos ao Complexo Hospitalario Universitario de Ourense, correspondendo á Axencia Galega de Infraestruturas a súa contratación e ao Servizo Galego de Saúde a supervisión do proxecto e o seu aboamento por un importe de 10.890 euros, IVE engadido, con cargo á aplicación orzamentaria 5001 412A 621.1
2. Dispoñer do crédito necesario para a execución das obras en tanto non sexa achegado polas partes obrigadas.
3. Remitir á Axencia Galega de Infraestruturas o proxecto de construción dos accesos ao Complexo Hospitalario Universitario de Ourense.
4. Encomendar á Axencia Galega de Infraestruturas a licitación, adxudicación, execución e dirección das obras obxecto do convenio así como o desenvolvemento de calquera actuación que sexa necesaria para a execución destas.
5. Consonte ao artigo 198.2 da Lei 9/2002, de 30 de decembro, de ordenación urbanística e protección do medio rural, remitir o proxecto de urbanización dos



**XUNTA
DE GALICIA**



**Concello de
OURENSE**

- accesos ao Complexo Hospitalario Universitario de Ourense ao Concello de Ourense para a súa conformidade ou desconformidade.
6. Prestar, cando lle sexa requirido pola Axencia Galega de Infraestruturas, en calquera das fases na que se atope a execución da presente actuación, a información, axuda e colaboración técnica necesaria para desenvolver satisfactoriamente a obra de acceso ao Complexo Hospitalario Universitario de Ourense.
 7. Asistir ó acto de recepción das obras que terá os efectos de entrega destas, de conformidade coa cláusula cuarta.

TERCEIRA.- COMPROMISOS DA AXENCIA GALEGA DE INFRAESTRUTURAS (AXI)

A Xunta de Galicia, a través da Axencia Galega de Infraestruturas comprométese a:

1. Dirixir a redacción, replantexar e aprobar o proxecto de construción no que se formulen as obras e actuacións previstas no presente convenio. Previamente á aprobación do proxecto, este será remitido á Deputación Provincial de Ourense e ao Concello de Ourense, para a prestación de conformidade por estas entidades, en tanto que cofinanciadoras da actuación. A conformidade ou desconformidade destas entidades manifestarase polos órganos competentes no prazo de cinco días hábiles dende a recepción do proxecto, entendéndose que presta a conformidade se non comunica o contrario no dito prazo. A desconformidade da Deputación e o Concello de Ourense, de ser o caso, só poderá basearse na discordancia substancial do proxecto respecto da memoria anexa ao presente convenio ou por ser contrario á legalidade vixente ou na existencia de solucións técnicas mais axeitadas e económicas para a definición e execución das obras, sempre que estas non supoñan unha diminución da calidade do proxecto.
2. Licitar, adxudicar, executar e dirixir as obras obxecto do convenio así como desenvolver calquera actuación que sexa necesaria para a execución destas.



**XUNTA
DE GALICIA**



**Concello de
OURENSE**

3. Comunicar ó concello de Ourense e á Deputación Provincial de Ourense a adxudicación do contrato de obras para que procedan ao ingreso das cantidades estipuladas no presente convenio no prazo de un mes dende a notificación da dita comunicación.
4. Recibir as obras executadas. A Axencia Galega de Infraestruturas poñerá este acto en coñecemento do Concello de Ourense, mediante comunicación formal.

Con posterioridade, formalizarase a correspondente acta de entrega ao Concello nun prazo máximo dun mes desde a comunicación da Axencia Galega de Infraestruturas, sendo a data de recepción das obras a que determina o nacemento da obriga asumida polo concello na cláusula cuarta apartado cuarto deste convenio, sen prexuízo das responsabilidades que correspondan ao contratista derivadas do contrato de obra.

CUARTA.- OBRIGAS DO CONCELLO DE OURENSE

O Concello de Ourense comprométese a:

1. Financiar a obra “ Urbanización dos accesos ao CHUO” cunha achega máxima de 410.731,48 € IVE engadido, con cargo aos orzamentos xerais do Concello de Ourense para o exercicio económico de 2016. A estes efectos, Concello de Ourense comprométese a realizar unha achega económica á favor da Xunta de Galicia, polo importe máximo expresado, con destino a gastos de urbanización que se realicen en solo urbano consolidado de acordo coa memoria descritiva que figura como anexo a este convenio, e sempre que se trate de actuacións urbanizadoras que queden fora da Area de Reparto 39-E., incluídas na citada memoria descritiva.
2. Cara ao cumprimento deste compromiso, a Xunta de Goberno local do Concello de Ourense como órgano competente para aprobar o proxecto de orzamento do exercicio en curso, así como para a súa aprobación definitiva en caso de negativa polo



XUNTA
DE GALICIA



Concello de
OURENSE

Pleno da Corporación, obrígase a dotar de crédito adecuado e suficiente o orzamento do exercicio 2016 , para facer fronte á súa achega económica.

Esta habilitación crediticia operará como condición suspensiva de eficacia, toda vez que non resultará esixible a obriga económica estipulada, namentres non se aproben os orzamentos para o exercicio en curso.

O importe será transferido polo Concello de Ourense ao Servizo Galego de Saúde ao número de conta ES75 0081 5363 29 0001087413 do Banco Sabadell, no momento da recepción das obras en cuestión pola Axencia Galega de Infraestruturas. Para este efecto a Axencia Galega de Infraestruturas deberá comunicar ao Concello de Ourense o proxecto construtivo, a adxudicación do contrato de obras, e as certificacións de obras que foran expedidas e aprobadas da obra “ Urbanización dos accesos ao CHUO”.

Asemade, o Concello de Ourense deberá indicar como concepto de ingreso “Urbanización dos accesos ao CHUO”.

No suposto de incumprimento das obrigas previstas nesta cláusula o Servizo Galego de Saúde poderá, de conformidade coa normativa aplicable, reclamar ao concello de Ourense os danos e prexuízos ocasionados derivados dos gastos en que o Servizo Galego de Saúde tivese incorrido na execución da obra e que o Concello se comprometeu a financiar en virtude desta cláusula.

3. Achegar ao SERGAS, unha vez asinado o convenio e no prazo máximo de 5 días, certificado do acordo adoptado polo órgano que legalmente teña atribuída a competencia da posta a disposición do SERGAS, dos terreos necesarios, libres de cargas e gravames e co réxime urbanístico axeitado para a execución das obras descritas na cláusula primeira, así como a reposición de servizos e servidumes afectados non incluídos no proxecto.



**XUNTA
DE GALICIA**



**Concello de
OURENSE**

4. Recibir as obras executadas no prazo máximo dun mes dende o requirimento da Xunta de Galicia, téndose por entregadas, para os exclusivos efectos do mantemento e conservación da obra, se nese prazo o concello non as da por recibidas sen xusta causa.

5. Asumir, unha vez realizadas as obras e logo da súa recepción a través da correspondente acta, a titularidade, explotación, mantemento e conservación das obras e os seus servizos.

QUINTA.- OBRIGAS DA DEPUTACIÓN PROVINCIAL DE OURENSE

A Deputación Provincial de Ourense comprométese a:

1. Financiar as obras cun investimento máximo de 949.614,05 € IVE engadido.

Para posibilitar a execución deste compromiso, a Deputación Provincial de Ourense obrígase a tramitar e aprobar inicialmente, no mes de marzo de 2016, o oportuno expediente de modificación de créditos orzamentarios que permita a dotación de crédito adecuado e suficiente nos seus orzamentos para a realización desta achega, xustificada en virtude do seu deber de urbanización dos terreos incluídos na área de reparto 39 E, como membro da Xunta de Compensación do dito ámbito de equidistribución.

Esta habilitación crediticia operará como condición suspensiva de eficacia, toda vez que non resultará esixible a obriga económica estipulada, namentres non se habilite a nomeada partida.

2. Os importes serán transferidos pola Deputación Provincial de Ourense ao Servizo Galego de Saúde ao número de conta ES75 0081 5363 29 0001087413 do Banco Sabadell, no momento da recepción das obras en cuestión pola Axencia Galega de Infraestruturas. Para este efecto a Axencia Galega de Infraestruturas deberá comunicar á Deputación de Ourense o proxecto construtivo, a adxudicación do



**XUNTA
DE GALICIA**



**Concello de
OURENSE**

contrato de obras, e as certificacións de obras que foran expedidas e aprobadas da obra “Urbanización dos accesos ao CHUO”.

3. No suposto en que a modificación orzamentaria non se efectúe no prazo estipulado o Servizo Galego de Saúde poderá proceder a reclamar á Deputación de Ourense os danos e prexuízos ocasionados derivados dos gastos en que o Servizo Galego de Saúde tivese incorrido na execución da obra e que a Deputación se comprometeu a financiar en virtude desta cláusula.

SEXTA.- COMISIÓN DE SEGUIMIENTO

Para o impulso e cumprimento deste convenio constituirase unha Comisión de Seguimento formada por un representante da Axencia Galega de Infraestruturas, un representante do Servizo Galego de Saúde, un representante da Deputación Provincial de Ourense e un representante do Concello de Ourense.

Presidirá a Comisión de Seguimento a presidenta da Axencia Galega de Infraestruturas, ou persoa na que delegue. Actuará como secretario da comisión un funcionario da Axencia, designado pola presidencia.

No non disposto neste convenio, o réxime de funcionamento aplicable á Comisión será o determinado polas normas común de funcionamento dos órganos colexiados das administracións públicas.

As funcións da Comisión de Seguimento serán, entre outras, as seguintes:

1. Impulsar e avaliar o cumprimento do presente convenio, propoñendo as actuacións que se consideren precisas.
2. Interpretar, en caso de dúbida, e con carácter executivo, o contido do presente convenio.
3. Propoñer ás partes a resolución das posibles controversias que puideran xurdir na aplicación do convenio.



XUNTA
DE GALICIA



Concello de
OURENSE

3. Aprobar a liquidación do convenio, unha vez concluída a execución e entrega das obras.

Todas as incidencias que poidan xurdir na aplicación deste convenio serán sometidas á Comisión de Seguimento, que resolverá de mutuo acordo.

Contra os acordos da Comisión Executiva, en caso de que poñan fin á vía administrativa, procederán as accións administrativas e legais contempladas no ordenamento xurídico.

SÉTIMA.- MODIFICACIÓNS DO CONVENIO

As modificacións formalizaranse mediante *addenda*, cos mesmos requisitos e condicións que para a aprobación do convenio.

Non terán a consideración de modificacións do convenio as modificacións do proxecto de obras de carácter técnico, aprobadas polo órgano de contratación de acordo coa normativa de contratos administrativos, sempre que non impliquen a superación do importe máximo reflectido na cláusula primeira do convenio.

O incremento das achegas previstas inicialmente, correspondentes á Deputación Provincial e ao Concello de Ourense, e calquera que sexa a súa causa, requirirá a conformidade expresa destes.

Non será preciso o trámite de modificación do convenio para á súa liquidación. De existir remanentes do financiamento para a execución das obras, estes serán reintegrados á Deputación e ao Concello de Ourense, segundo corresponda.

OITAVA.- CAUSAS DE RESOLUCIÓN

Serán causas de resolución do presente Convenio as seguintes:

- O incumprimento do seu obxecto,



**XUNTA
DE GALICIA**



**Concello de
OURENSE**

- A inviabilidade da realización das actuacións descritas neste convenio, por causas non imputables ás partes.
- O incumprimento de carácter total ou parcial de calquera das cláusulas do presente convenio. Entenderase por incumprimento parcial aquel que implica en maior ou menor grao a non consecución dos fins propios do convenio ou impidan de xeito directo ou indirecto as actuacións previstas no presente convenio.

Cada unha das situacións descritas por si soa é causa suficiente de resolución do convenio. A resolución do convenio será acordada pola administración pública interesada, previo o informe preceptivo da Comisión de Seguimento. Contra o acordo de resolución adoptado por calquera das partes, o resto de subscritores do convenio poderá exercer as accións administrativas ou xudiciais previstas no ordenamento xurídico.

NOVENA.- VIXENCIA DO CONVENIO

Este convenio producirá efectos dende a data da súa sinatura ata o 31 de decembro de 2016.

Non obstante, poderase realizar unha ampliación do prazo previsto no parágrafo anterior por un período de ata un ano, previa solicitude a través da Comisión de Seguimento citada na cláusula quinta.

DÉCIMA.- RÉXIME XURÍDICO

O presente convenio ten natureza administrativa e rexerase pola Lei 30/1992, do 26 de novembro, de Réxime xurídico das administracións públicas e do procedemento administrativo común, pola Lei 5/1997, do 22 de xullo, de normas reguladoras da Administración local de Galicia. No seu defecto, rexerase polo Real decreto lexislativo 3/2011, de 14 de novembro, polo que se aproba o texto refundido da Lei de contratos do sector público e demais normas de dereito administrativo e, no seu defecto, polas normas de dereito privado.



XUNTA
DE GALICIA



Concello de
OURENSE

A Sala do Contencioso - Administrativa do Tribunal Superior de Xustiza de Galicia será competente para o coñecemento de posibles cuestións litixiosas que poidan suscitarse, de acordo co artigo 10,1-g da Lei 29/1988, de 13 de xullo, reguladora da Xurisdición contencioso – administrativa.

O presente convenio obriga ao cumprimento do expresamente pactado someténdose todas as partes ao acordado en todas as estipulacións. Así o outorgan no lugar e data do encabezamento, subscribindo o presente convenio por caduplicado exemplar.

O presidente do Servizo Galego de Saúde

A presidenta da Axencia Galega de
Infraestruturas

Jesús Vázquez Almuíña

Ethel María Vázquez Mourelle

O alcalde do Concello de Ourense

O presidente da Deputación Provincial
de Ourense

Jesús Vázquez Abad

José Manuel Baltar Blanco

